

WORD

¹⁶Isang araw, habang naglalakad si Hesus sa tabi ng Lawa ng Galilea, nakita nya ang magkapatid na mangingisdang sina Simon at Andres. Naghahagis sila ng lambat. ¹⁷Sinabi ni Jesus sa kanila, "Sumunod kayo sa akin at gagawin ko kayong mangingisda ng tao." ¹⁸Iniwan agad nila ang kanilang mga lambat at sumunod sa kanya. **MARCOS 1:16-18**

Nang inimitahan ni Jesus sina Simon at Andrew na sumunod sa Kanya, tumugon sila nang agad-agad at nang buong puso. Nang oras ding iyon, agad nilang iniwan ang kanilang mga ginagawa para sumunod sa Kanya. Marahil ay marami silang katanungan at hindi nila alam kung saan sila papunta, pero sumunod pa rin sila sa Kanya. Sa araling ito, aalamin natin kung paano sumunod kay Jesus. Ating titignan ang mga kwento sa Lucas 9 tungkol sa tatlong lalaki na muntik nang maging tagasunod ni Jesus.

1 Walang kondisyon

⁵⁷Habang naglalakad sila, may isang lalaking nagsabi kay Jesus, "Susunod po ako sa inyo kahit saan." ⁵⁸Pero sinagot siya ni Jesus, "May mga lungga ang mga asong gubat, at may mga pugad ang mga ibon. Ngunit ako na Anak ng Tao ay walang sariling tahanan na mapagpapahingahan." **LUCAS 9:57,58**

Nang sinabi ng isang lalaki na nais niyang sumunod kay Jesus, hinamon siya ni Jesus. Pinaalalahanan siya na ang pagsunod sa Kanya ay hindi madali, maginhawa, o kaiga-igaya. Gaya ng ginawa nila Simon at Andrew, ang pagsunod kay Jesus ay walang kondisyon at hindi naaayon sa sariling pagkakaunawa. Ang pagsunod sa Kanya ay nangangahulugan ng buong pusong pagnanais at paghahanda sa anumang pagsubok. Anong mga pagsubok ang napagdaanan mo sa pagsunod mo kay Jesus? Bakit ka sumusunod sa Kanya sa kabila ng mga pagsubok?

2 Walang pagpapaliban

⁵⁹Sinabi ni Jesus sa isa, "Sumunod ka sa akin." Pero sumagot siya, "Panginoon, pauwiin po muna ninyo ako para maipalibing ko ang aking ama."

⁶⁰Pero sinabi sa kanya ni Jesus, "Ipaubaya mo sa mga patay ang paglilibing sa kanilang patay. Pero ikaw, lumakad ka at ipangaral ang tungkol sa paghahari ng Diyos." **LUCAS 9:59,60**

Nang sinabihan ni Jesus ang isa pang lalaki na sumunod sa Kanya, ninais ng lalaki na una munang tuparin ang kanyang tungkulin ayon sa kultura. Bagamat iniutos ni Jesus na parangalan natin ang ating mga magulang, hinihingi din Niya ang agaran at ganap na pagsunod. Kung tayo ay susunod sa Kanya, hindi ito dapat ipagpaliban at hindi tayo dapat gumawa ng mga dahilan upang hindi sumunod. Gaya ng pagsunod nila Simon at Andrew nang agad-agad, tinatawag tayo ni Jesus na gawin din ito. Bagamat ang tugon ni Jesus ay nakasakit sa damdamin para sa ilan, bakit ito ang nararapat na tugon? Bakit kailangang pahalagahan ang iniuutos ni Jesus nang higit pa sa pamilya, kultura, o sariling kagustuhan?

3 Walang pang-abala

⁶¹May isa ring nagsabi kay Jesus, "Susunod po ako sa inyo Panginoon, pero hayaan po muna ninyong magpaalam ako sa pamilya ko." ⁶²Sinabi ni Hesus sa kanya, "Ang sinumang nag-aararo na palaging lumilingon ay hindi kapaki-pakinabang ang paglilingkod sa ilalim ng paghahari ng Diyos." **LUCAS 9:61,62**

Isa pang lalaki ang nagsabi kay Jesus na nais niyang sumunod ngunit hindi pa buo ang kanyang loob para dito. Sinabi sa kanya ni Jesus na ang pagsunod sa Kanya ay ang pagpapasya na ibigay ang buong-buo sa Kanya. Ang paghawak sa araro at paglingon sa mga bagay na tinalikuran na ay magdudulot ng pagliko natin sa maling daan at tayo'y hindi magtatagumpay sa ating gawain. Kung tayo ay tapat sa ating pagsunod kay Jesus, ating tatanggihan ang anumang bagay na mang-aabala o magbibigay ng kalituhan sa ating mga pag-iisip at kukuha ng Kanyang lugar sa ating mga buhay. Ano ang kinailangang talikuran nina James at John upang sumunod kay Jesus (Marcos 1:19,20)?